

PETRUQ Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jino gyo râ matú le, Yhâng é suí èq hpyûn gyûn é hui* râ matú le, haû Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyî má cháng luî, hkyin yù huí é bang nghut é, ² Garai Gasâng èq hkyin htoq yù luî, mingkân é byùbúng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyí sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhông é Yhumsîng Yesuq Hkrisduq é Yhângwa nghut sù Garai Gasang chyáng nghut nyí sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyîn é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó, ⁴ nungmoq é matú mauhkûng htoq má tô to byi bê nghut é, hkâ-nhám le, a hten a byoq é, agot a-û a dut é, a hpoí byuq é muí lé le wó nhang é nghut lhê. ⁵ Nungmoq gi, lumjíng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaî é hpungwup a-tsâm èq upzúng é hui bang nghut akô. ⁶ Haû mù, nungmoq gi, ahkuí razup zo, wuîhke hkyô junghkang

* 1:1 Yhâng é suí èq hpyûn gyûn é hui gâ é gi, Yhâng é suí èq mara chí sân pyám byî é lé gâ lhê.

jungmó má yón hpuzô é hui kó râ nghut kôlhang, gyai yhang gabú nyî keq. ⁷ Wuîhke hkyô haú pé mai, nungmoq é lumjínq myit gi, jet é hkyô lé wó chyam htoq mù, myi mai jên yù kôlhang htên byoq sê é hîng htoq je gyaú luî, Yesuq Hkrisduq htoq shit é hkûn, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhang, Yhang lé chyitdap bum akô; Ahkuî, nungmoq, Yhang lé a myàng kôlhang, Yhang lé lumjínq kô é nghut mù, a ung htoq taî é eq hpungwup bo é gabú hkyô gi, nungmoq chyáng byíng jup nyi ri. ⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjínq myit é akyû lé wó yu nyi kô é nghut ri.

¹⁰ Hkyi yù hkyô haú eq séng luî, nungmoq chyáng jé bê nghut é jeju hkyô lé taî é myiqhtoî pé gi, gyai yhang sidiq myit èq jí jí chyun chyun ho gon wú bekô nghut ri. ¹¹ Yhangmoq gi, Hkrisduq wuîhke jamjau hui luî, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taî é hkûn, hkâ-nhám nghut râ eq hkasû é u má nghut râ hkyô lé ho gôn wú bekô nghut ri. ¹² Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuî nungmoq lé taî kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lháng gi, haú hkyô pé lé gyai wú nau bum akô nghut ri.

Chyoiyúng Nyî Râ Hkyô

¹³ Haú mù luî, zui saí râ matú nungmoq é i-myt lé hen to keq; yhumsing gùng yhumsîng hking nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq. ¹⁴ Jino gyô é zoshâng

wuì su, myoq a bóng shî é pyat má nungmoq nyi tô é hkûn, nungmoq é agè ashop ô nàu hkyô lé a châng kut é za, ¹⁵ haù nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyî keq. ¹⁶ Hkâsu mù gâ le, "Ngò gi, chyoiyúng Sû nghut é yanmai, nungmoq le chyoiyúng nyî keq."☆ ga kê tô ri.

¹⁷ Byù yuq hkangmó é muzó lé, myoqdong a hkyin é za tarâ jéyáng é sù Îwa lé, nungmoq wut dung kê é yanmai, byùbínđ đông shî má nyi é u lé, Garai lé gyuq hkunggâ é myit mai asak ðuì keq. ¹⁸ Hkâsu mù gâ le, nungmoq gi, nungmoq é îchyí îwâ pê chyáng mai bo gyó lo é hpau a ðap é asak ðuì hkyô mai, htên byoq sê é ngùn, hing èq hkyi yù huí é a nghut é za, ¹⁹ gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlhang, jìhtûm ahkyíng shí pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq ðui toq yù mù, hpungwup shingkang bò nhang é Garai Gasang lé, nungmoq gi, Hkrisduq đông mai lumjínđ kê é nghut luí, nungmoq é lumjínđ myit eq myit myoqbyù hkyô gi, Garai Gasang chyáng nghut nyî bekô nghut ri.

²² Ahkuí kúm, nungmoq gi, haù tengmán hkyô lé châng é đông mai, yhumsing gùng yhumsínđ lhoq sân-yúng yù bekô nghut mù, nungmoq é gumang wuì lé, lhumsuz é đông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. ²³ Hkâsu mù gâ le, nungmoq gi, htên byoq sê é amyui mai dum hkû huí é a nghut é za, Garai Gasang é, rû ðui nyi é eq ru gínđ nyi é mungđang đông, htên byoq a sê é amyui mai dum hku é hui bang ru nghut lhê. ²⁴ Hkâsu mù gâ le,

☆ 1:16 Nhong 11:44-45; 19:2; 20:7

"Byù lhunglhang bang gi, wàhu mhan eq pung ri, yhang-moq banshoq bâng é hpungwup shing kang gi, yò mâ é banbó pé eq pung ri; wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kôlhang, haù Yhumsing é mung dang gi, ahtum abyuq gíng nyi lhê."[☆]
gâ tô ri. Haù gi, nungmoq lé hko kyo bê mung dang nghut lhê.

2

¹ Haù mù luí, i-myyit dû é hkyô banshoq eq mhaú zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkangmó pé lé tô pyám keq. ² Asik hku é zonú pé naú lé ô naù gadaú é su, woi-nyí eq sêng é jet é naú* lé ô naù gadaú nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gâ le, haù Yhumsíng gi, gè sù nghut é lé, nungmoq chyam wú bekô nghut ri.

Rû Dui Nyi É Luqqok Eq Hkyin Yù Huí É Byù Myû

⁴ Byu pé mai hkyin htoq pyám kôlhang, Garai Gasâng é matú hpau dap luí, Yhâng eq hkyin yù huí é, rû dui nyi é Luqqok nghut sù, haù Yhumsing chyáng nungmoq jé lé é hkûn, ⁵ nungmoq le, rû dui nyi é luqqok pé su, woi-nyí eq sêng é yhûm[†] saí nyi é hui luí, Yesuq Hkrisduq dông mai, Garaí eq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyû dut bekô nghut ri. ⁶ Hkâsu mù gâ le, Chyúmdang má,

[☆] 1:25 Esai 40:6-8 * 2:2 Woi-nyí eq sêng é jet é naú gâ é gi, Garai Gasâng é mung dang lé taí é nghut lhê. † 2:5 Woi-nyí eq sêng é yhûm gâ é gi, noqkuq hpúng lé taí nau é nghut lhê.

"Wú keq, hkyin yù huí é eq hpauđap é htungchyûn luqgok racham lé, Zi-un bùm má ngò lheq tô é nghut lhê; Yhang lé lumhkau é sù gi, hkâ-nhám le hoq hpû é hui râ a nghut."[☆]

ga taí tô ri. ⁷ Haû mù, lumjínđ bang nungmoq é matú gi, luqgok haû hpauđap é nghut lhê. Nghut kôlhang, a lumjínđ bânđ é matú gi,

"Haû yhûm saí bang hkyin htoq pyâm é luqgok gi, htungchyûn mâ é ahkyak dik é luqgok[‡] dut bê nghut ri."[☆]

ga le,

⁸"Byu pé lé, htûng leng râ luqgok eq myit leqbat nhâng râ luq mó cham dut bê nghut ri."[☆]

ga le, taí tô ri. Yhangmoq gi, mungđang lé a chánđ kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

⁹ Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó shánđ gaq ga, hkyin yù huí é byuhú, hkohkâm hkyangjong amyû, chyoiyúnđ é byù myû, Garai Gasang eq sênđ é byu pé nghut akô nghut ri. ¹⁰ Nungmoq gi, hí lé byù ra-myû a nghut wú kôlhang, ahkuí gi, Garai Gasânđ é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

¹¹ Chyitđap é luzúm wuí ê, nungmoq é asak woi-nyí lé majan zân nyi é, yubak mara byínđ jup é ô naù gadaú hkyô lé koi pyám keq nghû, gó mîng byu pé eq byùbínđ pé đônđ mingkan htoq má nyi é bang nungmoq lé, ngò, wum taí

☆ 2:6 Esai 28:16 ‡ 2:7 Ahkyak é luqgok gâ é gi, Hkrisđuq lé taí é nghut lhê. ☆ 2:7 Hkya-on 118:22 ☆ 2:8 Esai 8:14

tsuq kat lhê. ¹² Haû a lumjúng shî é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng eq lé kùm é buinyì má Garai lé shigyaú kó sháng gaq, a lumjúng shî é byu pê é ahkaû má haû su ge é asak duì hkyô dông nyì yap keq.

Uphkâng Bang Eq Yhumsîng Wui É A-ô Má Nyì Râ Hkyô

¹³ Haû Yhumsîng é yanmai, byu pé mâ é ahko ahkáng wó bang banshoq é a-ô má nyì keq; kô dik é ahkáng ayá wó é hkosêng é a-ô má nghut kôle, ¹⁴ shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng eq nhang tô é mauzaû pê é a-ô má nghut kôle, nyi nyì keq. ¹⁵ Hkâsu mù gâ le, ge é hkyô kut é dông, byù nâ pê é a sé a dat é dang lé nungmoq lhoq zîm pyâm é gi, Garai Gasâng ô nau é hkyô nghut lhê. ¹⁶ Lut bê bang dông nyì keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchúng kó; Garai Gasâng é dui-nhâng zoshâng wuì dông nyì keq. ¹⁷ Yuq hkangmó lé rago za hkunggâ é hkyô shit keq; lumjúng é gumang wuì lé chyitdap keq; Garai Gasâng lé gyuq hkunggâ nyì keq; hkoséng lé hkungga keq.

¹⁸ Dui-nhâng zoshâng wuì ê, hkungga myit banshoq eq, nungmoq é yhumsîng wuì é a-ô má nyì keq; ge é eq nú-nhám bâng é a-ô má za a nghut, byuwuì pê é a-ô má le nyì keq. ¹⁹ Hkâsu mù gâ le, byù rayuq gi, Garai Gasâng lé bûn nyì sù nghut é yanmai, mara dông a nghut kôlhang, wuîhke jamjau huì é hkyô lé hpuzô é lé, jân pyâm é nghut le gi, hkya-on gíng é sù nghut lhê. ²⁰ Nghut kôlhang, nungmoq gi, mara kut shut é yanmai, nhuq bat é hkâm zo luì, haû lé jân nyi é nghut le gi, hai aróng wó kó râ lú? Nghut kôlhang, nungmoq gi, ge é hkyô kut luì, wuîhke hui zô é lé jân pyâm é nghut jáng, haû gi, Garai Gasâng hí má

hkyo-on gíng é hkyô nghut lhê. ²¹ Nungmoq gi, haú hkyo é matú ji yù huí é nghut lhê; haí mù gâ le, Hkrisduq gi, nungmoq é matú wuĩhke hkyô huí é má, nungmoq lé alík đông tô to byi bê nghut mù, nungmoq gi, Yhâng é hkyî-kám pé lé cháng râ dut lhê.

²² "Yhang gi, hai mara le a kut shut, Yhâng é nhut mai mhaú é lé a myàng."☆

²³ Yhang gi, rhoi é huí é hkûn, yhangmoq lé a dum taú rhoi; wuĩhke hkyô huí é hkûn, kyuq é dang a taí. Haú kut râ malaî, tengmán é đông jéyáng é Su chyáng, Yhânggùng lé ap pyâm ri. ²⁴ Nga-nhúng gi, yubak mara eq wó shi gang mù, dıngmán hkyo é matú asak wó duí kó sháng gaq ga, Yhang gi, sik zıng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dàm pê é yanmai, nungmoq gi, lhoq gê byí é hui bekô nghut ri. ²⁵ Hkâsu mù gâ le, nungmoq gi, hkyô ngoq byuq é sau pé su dut wú kôlhang, ahkuî, nungmoq gi, haú sau zúng Sû eq nungmoq é asak woi-nyí lé upzúng Su chyáng lhing taú lò bekô nghut ri.

3

Ikun Myhî Pé Eq Ikun Hpô Pé

¹ Ikun myhî pé ê, haú eq rajung za, yhumsing é ikun hpó uphkang é a-ô má nyi keq; haú hkûn, yhangmoq mâ é rayuq yuq, haú mungdang lé a lumjıng kôlhang, ² yhumsing é asak duí hkyô mâ é sansêng é hkyô eq hkunggâ é hkyô lé myàng kôjáng, dang đông a nghut é za, yhâng é yhumsıng myhî é nyi yap é sâmlai đông mai yhang lé wó lhoq lhik yú râ nghut lhê. ³ Nungmoq yúng é hkyô gi, ahtoq pyâm za nghut é, xâmban nik é đông, hıng zè mhôn chung é eq réng é mebu wut é đông mai lo é a ge nghut. ⁴ Hau é malaî, haú gi, Garai Gasâng é hí má gù bo

☆ 2:22 Esai 53:9

é, nú-nhâm é eq zim za dut é woi-nyí é, a dat hpoí é yúng hkyô nghut é nungmoq é i-myt unghkaû mâ é su é yúng hkyô sheq dut râ lhê. ⁵ Hkâsu mù gà le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuì gi, yhangmoq gùng lé haû dông mhôn yù yù kut kô é nghut lhê. ⁶ Sarah gi, Abraham é jìno gyo luì, yhang lé yhâng é yhumsîng ga wut é su, yhangmoq gi, ó le ô é yhumsing é ikun hpó uphkang é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haû eq rajung za, yhumsing é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haû hkûn, nungmoq é kyûdung dang lé a he-ngik pyám byi râ nghut lhê.

Ge É Kut Luì, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huì lhûm nyi keq; myit wú nô mù, gumang nhiktâng wuì su chyitdap lhûm nyi keq; shogyo nhikmyin myit bò luì, i-myt nyhum nyi keq. ⁹ Agè ashop é lé, agè ashop é dông lató a hpouq é eq rhoi é lé rhoi é dông lató a hpouq é za, shimân byi keq; haû mù gà le, nungmoq gi, haû pé é matú, shimân jeju mù wó hkam yù kó sháng gaq ga, ji yu é hui kô é ru nghut lhê. ¹⁰ Hkâsu mù gà le,

"Asak duì râ lé chyitdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuì lé, mhaú dang taí é mai, lhoq kâng pyám ra râ nghut lhê.

¹¹ Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguingón simsaq hkyô lé hô mù, châng hkat nyi ra râ nghut lhê.

¹² Hkâsu mù gâ le, haû Yhumsing é myoqjî gi, dingmán bang lé wú nyi é nghut luí, yhangmoq é kyúdung dang lé, Yhâng é nohkyap èq gyo byî ri; nghut kôlhang, haû Yhumsing é myoqdong gi, agè ashop hkyô kut bang lé gyè dông myang pyâm ri."☆
gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhu? ¹⁴ Nghut kôlhang, dingmán hkyo é matú, nungmoq wuîhke jamjau huí le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."☆ ¹⁵ Nungmoq kúm gi, myit nhiklhum má, Hkrisduq lé, Yhumsing dông jowò byi keq. Nàng wó é myit myoqbyù hkyô lé myí é sù yuq hkanmó lé, haî mù wó é hkyô tú taî kyo râ matú, ayang hen to aq. Nghut kôlhang, núnhâm é eq hkunggâ é dông haû lé kut nyi aq; ¹⁶ nungmoq é unghkaû myit san za dut nyi keq, haû hkûn, Hkrisduq dông mai nungmoq wó é ge é a-kyang lé rhoî dang taî é bang gi, yhangmoq lumù gansang é yanmai hoq hpû é hui kó râ nghut lhê. ¹⁷ Garai Gasang ô nau é nghut le gi, agè ashop kut luí jamjau hkâm râ htoq má, ge é kut luí jamjau hkam le gi, je ge é nghut lhê. ¹⁸ Hkâsu mù gâ le, nungmoq lé Garai Gasâng chyáng shuî jé shoq, Hkrisduq gi, byu pê é yubak marâ é yanmai, radàm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byí é nghut lhê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri. ¹⁹ Yhang gi, Woi-nyí dông, htóng lúng tô é woi-nyí pé lé ê hko kyô ri. ²⁰ Woi-nyí haú pé gi, a-nham lé, Noaq é ipyat má wuîsanghpo lé Noaq tsuq nyi é hkûn Garai Gasang myit hîng hîng lánq nyi é u lé, jìno a gyô é bang nghut akô. Wuî-

☆ 3:12 Hkya-on 34:12-16 ☆ 3:14 Esai 8:12

sanghpo má wàng mù, wuì mai hkyi yù huí é byù shau luí, shit yuq za nghut akô. ²¹ Wuì haú gi, ahkuí nungmoq lé le hkyi yu é nghut é baptisma é azòng nghut ri; haú gi, gungdu mâ é agot a-û lé huí sêng pyám byí é a nghut é za, sansêng é unghkaú myit mai Garai Gasâng é hí má gidiq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô é nghut lhê. ²² Yesuq Hkrisduq gi, mauhkúng má doq ló luí, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkang é a-ô má nghut nyi bum akô.

4

Garai Gasâng É Matú Asak Dui Râ Hkyô

¹ Haú mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehking dông wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri. ² Haú nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê. ³ Hkâsu mù gâ le, nungmoq gi, láì lò bê ahkýng má, a lumjng shí é byu pé hkyin kut nau é hkyô nghut é, shut é dông nyi zô lhúm nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achaq achyut kut é hkyô, ye lhai râ wut jung zoshuq lé yut yut ô nau é hkyô, achaq achyut é hparà noq hkyô pé má, ahkýng luq shoq nyi láì lò bê bang nghut akô. ⁴ Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri. ⁵ Nghut kôlhang, yhangmoq gi, dui nyi é bang eq shí bê bang lé tarâ jéyáng râ rì rì nghut to

Sû lé jihpán shit kyo ra kó râ nghut lhê. ⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luí ga jang, yhangmoq gi, byù dông mai tarâ jéyáng é hui râ eq, woi-nyí eq séng luí ga jang, Garai Gasang dông mai asak wó duí râ matú nghut lhê.

⁷ Lhunglhang htum râ ahkýng gi, chyáng bê nghut ri. Haû mù luí, nungmoq kyû wó dung kó sháng gaq, bûn gyíng luí, yhumsing gùng yhumsíng hkang nyí keq. ⁸ Banshoq htoq má ahkyak é gi, rayuq eq rayuq gyai yhang chyitdap lhûm é hkyô nghut lhê, haí mù gâ le, chyitdap myit gi, yubak mara myo myo lé wó nghop pyâm é nghut lhê. ⁹ Rayuq eq rayuq, taí nyung nyâng é hkyô a bo é za, rago hkulum lhum keq. ¹⁰ Yuq hkangmó gi, yhumsíng wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé, lhumzui é èq rago chung jaí râ lhê. ¹¹ Rayuq yuq taí é nghut jáng, Garai Gasâng é mungdang haû eq yhang rajung za taí ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra râ nghut lhê. Haû hpungwup shíngkang eq a-tsam gi, Yesuq Hkrisduq chyáng pyat dedu ahtum abyuq joq nyí sháng gaq ô. Amen.

Hkristan Dut É Yanmai Jamjau Huí É Hkyô

¹² Chyitdap é luzúm wuí ê, wuíhke hkyô dông chyam é lé nungmoq hkâm zô nyí é hkûn, nungmoq chyáng maú nhô zâ é hkyô dut htoq bê dông, hkâgyuq dàn kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shíngkang eq rahá Yhang htoq shit é hkûn, nungmoq gi, gabú dik é hui kó râ nghut lhê. ¹⁴ Hkrisduq é myíng

yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gâ le, hpungwup shing kang bo é Woi-nyí ngu é, Garai Gasâng é Woi-nyí gi, nungmoq chyáng nyi nyi ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotû agè ashop kut sù, góbâng é mù má cháng gunjang sù đông jamjau huí é a dut sháng gaq. ¹⁶ Nghut kôlhang, Hkristan rayuq đông nungmoq jamjau huí é nghut le gi, hkâhoq nyí kó, Garai Gasang lé kúm gi, myìng hau é yanmai hkya-ôn nyi keq. ¹⁷ Hkâsu mù gâ le, tarâ jéyáng râ ahkýng gi, jé bê nghut luí, Garai Gasâng é ikun byu pé mai hî râ nghut lhê; haú gi, nganhúng mai hi é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê lú?

¹⁸ "Haú dingmán sù, hkyi yù hui râ wuí é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lú?"[☆]

gâ tô ri.

¹⁹ Haú nghut mù luí, Garai Gasang ô nau é đông jamjau huí é bang gi, yhumsing gùng lé, lhumsuz é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wuí Êq Zorâm Wuí

¹ Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shing kang lé bo hkâm râ nghut sù đông mai sang kat kôlé:

² Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang đông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm

[☆] 4:18 Sânghkyang 11:31 * 5:2 Sau hpúng gâ é gi, lumjúng bang lé gâ lhê.

é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê. ³ Nungmoq é loq má ap byî to bê bang lé a up zô é za, yhangmoq é hí má alik dut nyî keq. ⁴ Haû jáng, Sau zúng Agyì mó† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó râ nghut lhê.

⁵ Zorâm wuì ê, nungmoq le, nungmoq htoq ipyat ko bâng é a-ô má nyî keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyî keq, hkâsu mù gâ le,

"Garai Gasang gi, nghutbûn é bang lé hkûm zing pyám

kôlhang, myit lhoq nyhum é bang lé jeju byî ri."☆

ga tô ri. ⁶ Haû mù luî, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsing myit lé yhumsîng lhoq nyhum nyî keq. ⁷ Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byî nyî sù nghut lhê.

⁸ Yhumsing gùng lé yhumsîng hkâng mù, machya nyî keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. ⁹ Yhang lé htuq htîng pyám mù, lumjîng myit má gingtîng nyî keq, haî mù gâ le, mingkan gón mâ é nungmoq é gumang wuì le, rajung zâ é jamjau hkyô pé hui zô nyî kô é lé, nungmoq sê lhê.

¹⁰ Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shingkâng matú nungmoq lé ji yù bê nghut luî, nungmoq razup zo jamjau huì é htâng má, Yhang yhang nungmoq lé gumjup nhâng mù, wum bô nhâng luî, ging ging tíng tíng dut

† 5:4 Sau zúng Agyì mó gâ é gi, Hkrisduq lé gâ é nghut lhê. ☆ 5:5 Sânghkyang 3:34

nhâng râ nghut lhê. ¹¹ Haû hpungwup a-tsam banshoq gi, Yhâng chyáng pyat dedu ahtum abyuq rû joq nyî sháng gaq. Amen.

Ló Htâng É Shi-kyâm Dang

¹² Lhumzuî é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gîng nyî keq.

¹³ Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri. ¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 17 Nov 2018 from source files dated 20 Jan 2018

23f9fc55-a8a4-59ef-9513-707ec336b0ee